

士賈勇先登獲其醜幾三百人斬馘千級其餘俘獲不可數計稽諸前政成功之奇速未有若是之烈也夫用兵之法一曰形二曰氣三曰威四曰奇湟灘之師以形勝也浪泊之戰以氣隨也南中之擒以威讐也山越之擣以奇破也伏波諸葛之神畧公實兼之故能度其形而措勝養其士而氣銳奪其港而申威覆其穴而出奇華彝清謐喜氣磅礴於是胡守銘之堅石予序而頌曰雷爲戈今日爲

蓋肅旂旌兮耀炎海操參代兮靖氛靄窳
誅兮光帝載震萬世兮道無外

靈山軍器局記

何御

嘉靖十八年夏五月己巳靈山軍器局成崇
兵政也按廣東之郡十分隸兵備五道乃雷
廉二郡海北道總之嘉靖十年大巡楊公紹
芳邢公弟相繼以經武飭備請命允下五道
各于駐轄之處設軍器局一所惟海北則靈
山以之蓋靈山固咽喉二郡云爾又按粵志

雷廉密界延袤數千里薄海枕山接鄰彝徭
古稱必戰必守二郡其固然哉自洪武迄今
號爲寧謐雷若廉亦與受祉矣顧其地與省
會彌遠盜賊數起蹂殘鄉邑甚或如石康不
守裁入合浦閱嘉靖十數年剽藏而奪之金
者凡二三見他州縣可類也朝廷垂顧南服
率加軫茲土其命憲臣輒簡碩望以往我二
水孫公由司寇擢膺今秩重選也公旣至稽
籍正率汰弱陟強曰吁兵羸諸昔哉三之二

矣緣式比具遴堅合利曰吁器弊諸昔哉十之七矣始僣僣議議爲作局不欲併兵以速也曰庸若力而復浚之財哉茲以忍矣用迺協謀于陳太守健洪太守富爰及屬案胥贊胥同得稅畝金若干兩官爲處分只與民無疚焉遂相地以建曰舊射圃亭廢址爲之堂一座五間儀門大門各一座東西廂房各列爲十二間繚垣周土若干丈制翼翼張矣旣則卽工治鉤塼治筒炮治弧矢旌幟胄甲刺

鋒悉如制造肇領之局時而出焉罔復稱遺
器矣約助功泊于成未浹以歲民無樂爲已
衛哉採石備售之費百十金而奇器之費二
十金而奇尚貽其贏者以次別役績浮計嗇
蓋充充如也諸凡底奏武弁振恢隱然一敵
國矣藉令前此有作俾戎務寢寢有興雖以
事鉅敵無足稱諱者直曰媮之可用已乎是
故語全勝存乎戒公斯舉爲有悲矣矧聖天
子將問罪交彛徵兵遐徼雷廉勢固首事者

夫今其足憑也於乎除戎器戒不虞惟干戈
省厥躬五材並用無能去兵迺自古記之矣

水田亭記

在石康古城爲
郡守張岳立

包易

知縣郡人

廉爲東廣邈郡負山瀕海丘阜高亢水泉罕
通一遇旱灾卒歲之賴惟膏腴是資高亢者
鮮克有秋民多艱食焉前此爲守者以遷徙
代去視民隱漫不加意嘉靖乙未郡伯惠安
張公起名進士奉命來守是邦首詢民瘼惟
以輯寧爲已任每事務行寬大以惠元元乃

躬詣亢區若多權若五水若陳調若木水若
大浪凡廉之號爲高亢地者悉徧歷焉命民
峙乃錢鑄併力合作疏築澡瀹咸授以法每
田一成則於江之可障者上下築堤廣三十
尺袤一百八十尺高如廣者之半俾流泉由
溝以達之遂自遂以達之畝且周視地形水
勢之高下而經營導引之俾各就勢次第畢
舉不朞年而功告成埧塹堅厚水圳旁達昔
爲亢區今變良田如斯之類不下數十處厥

功大矣斯民懼無以昭大功乃礱石爲亭俾
予爲之記云

七賢太守祠

吳禮元

郡以廉名太守所致也古有廉山廉泉故自
東漢以來皆選廉士爲郡名實相應遂改合
浦爲廉郡焉府城東偏立七賢太守祠列位
奉祀曰孟曰謝曰蘇曰顏曰丁曰高曰季皆
前代德澤施於民相傳祀事而不能忘也志
書燬於兵火無以考據唯珠還合浦著在方

冊者孟嘗也每遇水旱災寇郡人禱之應如
影響歲久祠宇傾圯而木主尚存至正庚寅
春通守龔侯來涖是郡首謁祠下念前賢遺
澤惕然于懷欲興廢而鼎新之疑六賢不知
名諡舊無繪像歲時典祀無以致如在之誠
咨嗟久之余始視事之日侯以是告余曰不
然前代立祠褒封郡人事之久矣宜神明之
佑人也如星月之在天風雨晦冥人莫之見
而照臨之德未始不及于人者也又何待觀

容光而後瞻拜哉昔蕭敏中爲建陽縣令問
邑之先賢得陳師道陳仲修游定夫皆以文
學風節稱立三賢堂而祀之去職之後邑民
思蕭令之賢足以配三君子者遂更其榜爲
四賢堂焉今侯追慕七賢之遺風重建祠宇
使郡人得專祀之美他日必有思侯之德更
而榜爲八賢報侯之德于無窮也侯名文殊
奴字仲曄京師人廉簡易直無愧于七賢云

郡侯張公祠記

明 巫 鐸 教諭